



## **Komunikadu Imprensa**

26 Jullu 2013

### **Tribunál aplika suspensaun tinan 1 ba krime violénsia doméstika**

Iha 24 Jullu 2013, Tribunál Distritál Baucau julga arguida SC ne’ebé práтика krime ofensa ba integridade fízika simples ho natureza violénsia doméstika hasoru nia laen AFC.

Ministériu Públiku akuza arguida katak iha 22 Jullu 2013, arguida hirus no soe sai sira nia oan nia ropa husi uma laran. Tanba ne’e, lezadu fó hatene ba arguida katak labele halo hanesan ne’e. Maibé arguida nervoza liutan no foti garfu tuda ba iha lezadu (maske la kona) no arguida hodi katana taa lezadu nia liman kanek , tata iha lezadu nia tilun, no kotuk laran too hetan kanek no bubu.

“JSMP husu ba tribunál atu asegura katak krime violénsia doméstika hot-hotu hetan tratementu hanesan”, dehan Diretor Ezekutivu JSMP Luis de Oliveira Sampaio.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Arguida deklara katak akuzasaun Ministériu Públiku ne’e loos maibé kazu ne’e akontese tanba lezadu mak provoka no insulta. Arguida mós deklara katak nia la taa lezadu maibé tuda ho katana no kona iha lezadu nia liman.

Durante julgamentu arguida hatudu ninia arependementu no deklara ba tribunál katak sira dame malu ona.

Iha alegasaun finál, Ministériu Públiku husu ba tribunál atu kondena arguida ho pena prizaun fulan 3 maibe suspende ba tinan 1.

Defeza husu ba tribunál atu aplika pena admoestasaun tanba arguida konfesa, arepende nia hahalok nomós agora dau-daun sira dame malu ona.

Hafoin rona tiha alegasaun husi parte sira, tribunál suspende durante minutu 15 atu fo oportunidade ba parte sira hodi konsulta ba malu.

Tribunál kontinua fali audiésia no konklui kazu ne’e hodi kondena arguida ho pena prizaun fulan 4 maibé suspende ba tinan 1, no selu kustas judisiáriu US\$ 10.00.

Kazu ne'e rejista iha tribunál ho Númeru Prosesu: 62/Crm.S/2013/TDB. Julgamentu prejide husi Dra. Angela Faria Belo, Ministériu Públiku reprezenta husi Dr. Baltazar Ramos no arguida hetan defeza husi Dr. Marino da Cruz de Jesus no Dra. Elvira Maria da Costa husi ALFeLa (Asisténsia Legál ba Feto no Labarik).

Atu hetan informasaun kle'an liután favór kontaktu:

Luis de Oliveira Sampaio

Diretor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl